



# Ақмешіт

Газет  
1994 жылдың 15 сәуірінен  
бастап шығады

Қалалық қоғамдық-саяси әлеуметтік-  
ақпараттық тарихи-танымдық газет •  
E-mail: akmeshit.kz@mail.ru

## апталығы

Аялаймын сені, Қызылорда!

7 желтоқсан  
сейсенбі  
№97 (1799)  
2021 жыл

ҚАЗАҚСТАН  
ТӘУЕЛСІЗДІГІНЕ

30 ЖЫЛ

# ТӘУЕЛСІЗДІК ТАҒЫЛЫМЫ

## Нұрсұлтан НАЗАРБАЕВ, Қазақстан Республикасының Тұңғыш Президенті – Елбасы

Көп ұзамай ең қасиетті құндылығымыз – ел тәуелсіздігінің торқалы тойын атап өтеміз. Осыдан отыз жыл бұрын біз саналы түрде, өз дүниетанымымыз бен болмысымыздың негізі ретінде бостандық пен азаттыққа таңдау жасадық. Бүгінге дейінгі бұл мерзім адамзат тарихы үшін қас-қағым ғана сәт болғанымен, орда бұзар жасқа енді тоғыз тәуелсіз Қазақстан үшін ол – үлкен белес, асқаралы асу.

Мұндайға тек рухы күшті, бірлігі бекем жұрт қана қол жеткізе алады.

Арғыда сақ, ғұн бабаларымыз, беріде қаһарман түрік аталарымыз аласапыран замандардағы алақұйын дауылдарға төтеп беріп, Ұлы далада ұлық ұлыс құрды. Талай жұрт алапат соғыстар мен арпалысқан айқастарда үдере көшіп, бордай тозып, тастай үгіліп, құмдай шайылып кеткен замандарда қазақтар түрік жұртының ата қонысын, қара шаңырағын сақтап қалды.

Дана бабаларымыз өзін ғана емес, адал ғұрпын, дархан көңілін, таза тілін, әсем әні мен қоңыр күйін, мәйекті мәдениеті мен бай әдебиетін қоса сақтап, ұрпағына аманаттай білді. Тамырын да, тарихын да, күш-қуатын да Ұлы даладан алатын, көптеген этнос өкілдері татулық пен келісімде, береке-бірлікте бірге өмір сүріп жатқан дәл осындай елдің ұлы мен қызы болу – әр қазақстандықтың маңдайына жазылған шексіз бақыт.

Адамзат тарихындағы ең айтулы оқиғаларға толы ғасырлар тоғысында елімізді басқару маған үлкен сеніммен қатар зор жауапкершілік жүктеді. Мен өзім басшылық еткен отыз жылға жуық уақыт бойына туған халқымның сенімін ақтау үшін бар күш-жігерімді аянбай жұмсадым.

Ерлік пен елдікті ту еткен, жасампаздықты жалау еткен халқымыздың дербес мемлекет құрғанының отыз жылдық торқалы тойы қарсаңында тәуелсіздіктен тағылым алу үшін бүгін туған халқыммен ой бөлісуді жөн көрдім.

Тәуелсіздіктің мән-мағынасы туралы түрлі ғылым өкілдері өзінше тұжырым жа-

сайтыны анық. Бірақ бір нәрсе ақиқат, ол – ата-бабаларымыздың азаттық жолындағы жан алысып, жан беріскен сан ғасырлық күресінің заңды жалғасы, халықаралық құжаттармен бекітіліп, мәңгілікке берілген сыйы.

Тәуелсіздікке барар қиын жолдардағы сансыз көп шайқастар мен көтерілістерде қаншама қаһарман бабаларымыз шейіт болды. Оларды еске алу, құрметтеу – біздің парызымыз. Сондықтан біз жаңа заманда қантөгіске жол бермей, қасиетті киеміз – тәуелсіздікке сабыр мен төзімділік, ақыл мен парасат арқылы қол жеткіздік.

Мен миллиондаған адамды қанға бөктіріп, қисапсыз мол қиындықтардан тұратын XX ғасырдың ортасында дүниеге келдім. Бірінші дүниежүзілік соғысқа қазақтар қатыспаса да, патшаның 1916 жылғы маусым жарлығымен тыл жұмысы үшін әскерге шақырылды. Отаршыл өкіметтің өктемдігі мен зұлымдығы халықты ашыңдырып, төзімді тауысты. Сол кездегі Жетісу өлкесінің Қарқара, Қастек, Самсы өңірінде болған ұлт-азаттық көтерілістерге менің ата-бабаларым да қатысты.

Бұдан кейінгі қазақ даласын қанға бөктірген Азамат соғысы да халқымызға қисапсыз мол қасірет әкелді. Ашаршылықтың екі бірдей толқыны – 1921-22 жыл мен 1930-32 жылдардағы сұрқия саясат салдарынан орнаған зұлмат кезінде қазақтың тең жартысы қырылды. Ел есін енді жинай бастаған отызыншы жылдар соңында сталиндік қанды репрессия ұлтымыздың сүт бетіне шығар қаймақтарын жалмап кетті, сонымен бірге қатардағы қарапайым азаматтар да қанды қасаптан аман қалмады.

Өрине, мен бұл оқиғалардың бәрін көзіммен көрсем де, әкем мен анамның өзегін мұң мен зар өртеп, жанарын жасқа шылап отырып айтқан сөздерінен, азаттық жолында шейіт болған аруақтарға арнап, күбірлеп оқыған дұғаларынан естіп-біліп, көкірегіме түйіп өстім. Кейде ойлаймын: қазақ деген не деген



төзімді халық?! Көнбесе көніп, шыдамасқа шыдаған. Болашағы бұлдыр болған күннің өзінде сағын сындырмай, келешектен үмітін үзбеген. Қиындық атаулыға қасқая қарсы тұрып, үздіксіз алға жылжыған.

Адамзат тарихына ең қанды қырғын ретінде енген екінші дүниежүзілік соғыстың құ-

рамдас бөлігі – Ұлы Отан соғысының қаһарлы күндері, бала болсам да, әлі күнге дейін көз алдымнан кетпейді. Сәби кезімді еске алғанда әр үйден майданға аттанған ағаларым, ер-азаматының орнын жоқтатпай, «Бәрі де жеңіс үшін» деп, бел шешпей еңбек еткен аналарым мен женгелерім, қаршадай күнінен

өгізге жегілген соқамен жер жыртып, масақ теріп, еңбекпен көзін ашқан қатарластарым еске түседі. Менің еңбек тақырыбына жиі оралатынымның бір сыры да балалығын соғыс ұрпағын сол ауыр күндерден қалған естелікте болса керек.

Адамды қандай қиындықтан да аман алып шығатын күдірет еңбек екенін мен сәби кезімнен-ақ сезіндім. Кейінгі жастарға үнемі «Еңбек ет, отбасыңды асыра, еліңе қызмет қыл: өзің де табысты болып, Отаныңның да қуаты артады» дейтінім сондықтан.

Соғыстан соңғы кезеңдегі тың игеру, металл қорыту, болат балқыту – халық шаруашылығын қалпына келтірудің дәл ортасында жүрдік. Социализмнің артықшылығын да, кемшілігін де көрдік. Бір сөзбен айтқанда, Кеңес Одағы құрамында болған жетпіс жылдықтың нәтижесі біздің елдің пайдасына шешілген жоқ.

XX ғасыр басында алаш қайраткері Ахмет Байтұрсынұлы «Әлхамдүллі, алты миллион халықпыз» деген екен. Патшалық Ресейдегі 1913 жылғы ресми санақ бойынша, Дала өлкесінде, Түркістан өлкесіндегі қазақтарды қоспағанда, 5 миллион 597 мың халық тұрған. Демек, Аханның айтып отырғаны – күмән келтірмейтін ақиқат. Ал арада жарты ғасырдай уақыт өткенде КСРО-да 1959 жылы өткізілген санақта Қазақстандағы қазақтардың саны 2 миллион 787 мыңға дейін кеміп, республика халқының небәрі 30 пайызын ғана құраған.

Мен 1989 жылы республикамыздың бірінші басшысы болып сайландым. Дәл сол жылы өткізілген КСРО-ның ең соңғы халық санағының деректері бойынша, Қазақстандағы қазақтардың үлес салмағы небәрі 40,1% ғана еді.

Азат еліміздің жастары тәуелсіздікке барар жолдың қандай азапты болғанын, қандай құрбандықтар мен сынақтар – 1916 жылғы ұлт-азаттық көтеріліс, азамат соғысы, ашаршылықтың алапат екі толқыны, қуғын-сүргін мен репрессиялар, Ұлы Отан соғысы, тың игеру жылдарындағы жаппай қоныс аудартудың зардабы арқылы жеткенімізді білуі керек. Мұның өзі өткен тарихты қастерлеп, одан сабақ алу үшін қажет. Менің «Тәуелсіздік – бабалар қанымен келген киелі құндылық» дейтінім осыдан.

(Соңы 2-бетте)

## МЕРЕЙ

Өткен сенбе облыстық Н.Бекежанов атындағы қазақ академиялық музыкалық драма театрында Қазақстанның еңбек сіңірген қайраткері, Қызылорда облысының Құрметті азаматы Әмір-Темір Хүсейін Жүсіпұлының 80 жылдығына арналған «Театр – тағдыр тұмарым!» атты шығармашылық кеші өтті.

## ТЕАТР ТАРЛАНЫ

Мерейлі кеште облыс әкімі Гүлшара Әбдіқалықова мерейтой иесін құттықтап, өнер саласындағы еңбегін ерекше бағалады.

«Тәуелсіздігімізге 30 жыл болған еліміздің рухани байлығын арттырып, төл өнерімізді халықаралық деңгейде танытуда өнер өкілдерінің алар орны бар. Қазіргі таңда Сыр елінде мақтанш етіп айтамын өнердің тұңғырлы тұлғаларының тұтас ансамблі бар. Солардың сапында Қазақстанның еңбек сіңірген қайраткері, танымал режиссер, талантты сахна майталманы Хүсейін Жүсіпұлы Әмір-Темірдің есімі ерекше аталады. Еліміздің бірнеше театрында қызмет етіп, алайда, туған жерге деген перзенттік парызын өтеу үшін Қызылорда драма театрында қалған Хүсейін ағамыз бүгінде қазақ театр өнеріндегі өр болмысты өнер иесіне айналып отыр. Оны Сыр театрының ғана емес, жалпы қазақ өнерінің дамуына сүбелі үлес қосқан қайраткер деп танымыз. Театрдың шығармашылық ұжымын бір арнаға тоғыстырып, сахналық өнерді толыққанды етуге үздіксіз қызмет етіп келеді.

Міне, бүгін Сыр жұртшылығы, өнер сүйер қауым өзіңізбен бірге қуана тойлап жатыр. Мерейлі жасыңыз құтты болсын!», – деді облыс әкімі.

Аймақ басшысы мерейтой иесіне Сыр елінің өнер саласына қосқан



зор үлесі үшін алғыс білдіріп, Қызылорда облысының Құрмет грамотасын табыстап, нығана шапан жапты.

Мерейтойлық кеште өнер майталманы КСРО және Қазақ КСР Халық артисі Асанәлі Әшімов, Қазақстанның халық артисі Талғат Теменов құттықтап, оның театр өмірінде қалдырған өзіндік қолтаңбасы мен жоғары репертуарлық талғамын атап өтті. Ал ҚР Мәдениет және спорт министрі Ақтоты Райымқұлова-ның құттықтауын министрліктің жауапты қызметкері Гүлнафис Мырзашева жеткізді.

Шығармашылық кеште көрнекті жазушы, ҚР Мемлекеттік сыйлығының иегері Дулат Исабеков және С.Вургун атындағы Әзірбайжан Мемлекеттік орыс драма театрының көркемдік жетекшісі Мирбала Салими бейнеқұттықтауын жолдады.

Іс-шарада Алматы қаласындағы Г.Мүсірепов атындағы жасөспірімдер театрының Самал Байсейітова мен Максат Мақұлбеков бастаған өнер өкілдері режиссердің өмірлік жолы мен қызметіне арналған сахна қойылымдары мен ән композицияларын орындады.

А.БАЙ

## Көлік жөндейтін Айдана

Темір тұлпарды тізгіндеу әдетте ер адамға тән көрінісі белгілі. Бірақ соңғы жылдары көлік ролінде нәзік жандарды жиі көретін болдық. Дегенмен бұзылса тілін білмейтіндердің қатары көп. Ондай кезде барлығы көлік жөндеу орталықтарының көмегіне жүгінеді. Бүгінгі кейіпкеріміз Айдана Қажыбаева көлік жөндейді. Ол қазіргі таңда Қызылордадағы техникалық қызмет көрсету орталығында автокөлікші болып жұмыс істейді.



Айдана Қызылорда қаласының тұрмасы. №172 мектепті бітіріп, «Серпін» мемлекеттік бағдарламасы бойынша Семей қаласындағы көлік колледжіне оқуға түседі. Онда «Автокөліктерге техникалық қызмет көрсету, жөндеу және пайдалану» мамандығын тәмамдаған. Білім беру мекемесінен жиырма алты студент түлеп шыққан. Оның алтауы – нәзік жандар. Бүгінде өз мамандығы бойынша жұмыс істеп жатқан Айдана ғана.

Алғашында мамандығына айтарлықтай мән бермеген ол ІІ курстан бастап өз мамандығына қызығады. Оған себеп – тобындағы жігіттермен бірге көлік жөндеп, темір тұлпардың қырсырын меңгеруі еді. Үш жыл ізденісінің арқасында оқуды үздік бітірген ол туған жерге оралған соң жұмыс іздей бастайды. Бірнеше ай шаштараз, аспаз болып та бағын сынап көрген. Дегенмен ешқайсысы көңіліне жақпай, жұмыстан шығып кетеді. Ақырында өз мамандығы бойынша жұмысшы қабылдап жатқан орталыққа ат басын бұрады. Бастапқыда тәжірибе жинақтаушы болып кірген ол иналдырған бір ай ішінде өзінің іске ептілігін, біліктілігін көрсетіп, жұмысқа қабылданады. Осылайша қызметтегі алғашқы баспадағын

Қызылордадағы техникалық қызмет көрсету орталығында автокөлікші болып бастайды.

Теориялық білімін тәжірибелік дағдымен ұштастыра білген ару Александр Пан есімді шеберден автомобильдің электр жабдықтарымен қалай жұмыс істеу керектігін үйреніп, білікті мамандардың санатына қосылған.

«Көлік жөндеу, оны құрастыру ер адамның жұмысы ғой. Алғашында қызымыз үшін алаңдалдық. Расында оны жұмысқа жібергім келмеді. Тіпті еліміздің мықты қалаларына колонер үйрену үшін жібергім келді. Бірақ қазіргі кезеңде тәжірибелі маманға айналған. Жалақысы да тәп-тәуір.

– Менің бұл қызмет көрсету орталығында жұмыс істеп келе жатқаным 2 жылдан аса уақыт болды. Міндетім – автокөліктің электр жабдықтарын жөндеу. Болашақта өз кәсібімді ашқым келеді. Бұл әзірге тек жоспар ғана. Ең бастысы, мен өз мақсатыма жеттім және тәжірибе жинақтадым, бұл арманның да жүзеге асуы бек мүмкін», – деді Айдана.

А.БЕРДІБАЙҰЛЫ





